

UCAPAN PERDANA MENTERI DI PEMBU-  
KAAN KILANG KULITKRAFT, PETALING JAYA,  
SELANGOR PADA 15**HB** MEI, 1972

Yang Amat Berhormat Tun Dr. Ismail, Yang Berhormat Encik Ghafar Baba, Yang Terhormat Dif-dif, Saudara-saudara sekalian.

Saya terlebih dahulu mengucapkan berbanyak-banyak terima-kasih kepada Encik Ghafar dan Dato Mustapha, atas jemputan mereka untuk merasmikan Kilang Kulitkraft ini.

Pembukaan Kilang ini, pada hemat saya, membawa makna yang besar kepada kita semua, khususnya kepada MARA, kerana ini merupakan first break-through dalam bidang perindustrian moden yang dikendalikan sendiri oleh MARA. Tambahan pula, kedudukan Kilang ini, iaitu di tengah-tengah kawasan perindustrian Petaling Jaya, tentulah mendatangkan kemegahan bukan saja kepada Kerajaan bahkan kepada seluruh rakyat khususnya kaum Bumiputra.

Seperti yang kita semua tahu, sebelum Merdeka dulu, ada beberapa orang sahaja kaum Bumiputra yang berkecimpung dalam lapangan menjual kulit dan membuat barang-barang daripada kulit. Kerja-kerja yang biasa dibuat oleh mereka adalah terhadap kepada kerja-kerja menjual kulit-kulit mentah, membuat capal membuat patong-patong wayang kulit dan membaiki tapak-tapak kasut dan sepatu di penjuru-penjuru kedai dan di kaki-kaki lima.

Hari ini kita sama-sama merasa bangga, kerana kaum Bumiputra kita sudah boleh memproses kulit, sudah boleh membuat sepatu dan boot yang baik mutunya. Semua ini dibuat secara industri modern dengan bangunan kilang yang besar dan lengkap dengan jentera-jentera yang moden serta cara-cara pengeluaran yang teratur.

Hasil dari usaha ini, Pasukan Tentera kita sekarang berjalan dan berbaris dengan kasut-kasut buatan Kulitkraft. Pasukan-pasukan Polis Diraja kita berkawal dan meronda dengan kasut-kasut keluaran Kulitkraft. Pegawai-pegawai dan Kakitangan-kakitangan MARA dan Kulitkraft juga, bekerja dan menari dengan kasut-kasut buatan mereka sendiri, begitu juga sebahagian daripada orang ramai.

Saya tahu juga baliawa sahabat saya iaitu Yang Amat Berhormat Tim Dr. Ismail sangat gemar memakai sepatu-sepatu buatan Kulitkraft yang dibuat khas bertumit tinggi. Yang Berhormat Encik Ghafar Baba dan saya juga dapat bermain golf dengan sepatu-sepatu golf buatan Kulitkraft ini.

Saudara-saudara sekalian,

Projek ini menandakan satu tapak kemajuan bagi M A R A amnya dan bagi seluruh Bumiputra khususnya. Ini adalah juga satu lagi kejayaan dasar Kerajaan kita untuk menambahkan bilangan Bumiputra dalam lapangan perdagangan dan perindustrian.

Dengan adanya Kulitkraft, pengusaha-pengusaha kulit mentah dari seluruh negeri dapat memasarkan kulit-kulit mentah mereka dengan mudah dan dengan harga yang berpatutan. Ini adalah satu pertolongan besar kepada pengusaha-pengusaha kulit dan saya harap mereka akan terus menerus bergiat dan meninggikan lagi mutu kulit-kulit mentah mereka.

Dalam hubungan ini, Kerajaan sedang mengaturkan langkah-langkah tegas untuk meningkatkan perusahaan penternakan masa hadapan. Saya telah mengarahkan Jabatan Haiwan supaya meninjau semula sistem pawah yang ada sekarang ini untuk menggalakkan orang-orang kampung berternak kerbau lembu secara besar dan tidak hanya satu dua ekor saja. Rancangan yang lebih besar sedang giat dilaksanakan di Perak, Johor dan Kelantan, dan projek yang lebih besar lagi akan dilaksanakan dalam Rancangan Pahang Tenggara.

Dengan meningkatkan penghasilan binatang ternak di negara kita, saya percaya Kulitkraft dan perusahaan-perusahaan yang seumpamanya tidak lagi akan bergantung pada sumber-sumber luar untuk bahan mentah kilangnya.

Saya difahamkan Kulitkraft dapat mengadakan peluang kerja untuk lebih kurang 300 orang pekerja termasuk executive staff. Ini bermakna Kulitkraft mengambil peranan dalam soal membuka peluang pekerjaan dan memberikan latihan-latihan kemahiran yang dikehendaki. Pekerjaan membuat kasut memerlukan pekerja-pekerja yang mahir dan cekap dan saya gembira Kulitkraft telah

dapat melatih belia-belua dalam lapangan kemahiran ini. Ini juga adalah membuktikan kepada kita semua bahawa kaum Bumiputra boleh menjalankan apa juga jenis perusahaan yang kecil dan besar apabila mereka diberi peluang dan mendapat bimbingan dengan sepenuhnya.

Kepada Pegawai-pegawai dan Pekerja-pekerja Kulitkraft, saya suka memberi nasihat bahawa mereka janganlah berpuas hati dengan kejayaan yang tercapai hingga hari ini. Mereka hendaklah berusaha dengan lebih giat dan tekun lagi dan mempelajari dengan lebih mendalam akan semua kerja-kerja yang ditanggung oleh mereka supaya dapat meninggikan mutu hingga boleh dapat mengekspot kasut-kasut pengeluarannya ke luar negeri. Kejayaan Kilang ini di samping yang lain-lain pasti dapat menjadi contoh dan perangsang kepada kaum Bumiputra meneroka lapangan perusahaan.

Saya sukacita mendengar bahawa Kulitkraft telah pun mula membuka kedai-kedai runcit menjual kasut-kasut di beberapa negeri dan akan membuka beberapa buah lagi di serata negara. Usaha ini akan membantu peniaga-peniaga yang ada dan dapat menambah lagi bilangan peniaga Bumiputra. Barangkali boleh juga ditinjau samada pemasaran kasut Kulitkraft ini boleh dijalankan melalui kedai-kedai Borong dan runcit yang diselenggarakan oleh Syarikat Permodalan di Pahang dan lain-lain.

Saya sukacita, pada kesempatan ini, memberi tahu Pegawai-pegawai dan Pekerja-pekerja Kulitkraft bahawa saya telah mengarahkan M A R A supaya mengaturkan cara-cara untuk menjual saham-saham syarikat ini dan juga syarikat-syarikat M A R A yang lain kepada pekerja-pekerjanya. Saya percaya inilah cara yang wajar dan dapat menggalakkan lagi pekerja-pekerja sesebuah syarikat itu berusaha dengan lebih tekun dan lebih bersungguh-sungguh kerana mereka sendiri mempunyai hak milik dalam syarikat-syarikat yang berkenaan.

Seperkara yang patut saya sebutkan di sini ialah sumbangan beberapa orang mengenai projek ini, khasnya kepada Encik Wan Abdul Hamid yang sekarang ini menjadi Pengurus Besar P E R N A S, kerana beliaulah yang mula-mula membuat cadangan menubuhkan Kulitkraft ini. Pada masa itu beliau menjadi Pengarah Bahagian Perusahaan dan Perdagangan M A R A .

Akhirnya, saya suka mengucapkan ribuan terimakasih kepada Pegawai-pegawai dan Kakitangan Kilang ini atas persediaan-persediaan yang dibuat untuk upacara pembukaan Kilang ini.

Saya dengan sukacita membuka Kilang Kulitkraft ini dengan rasminya.